

Dinamika honetara bildu garenok Palestinaren egoerari kezka begiratzen diogun norbanakoak gara. Bat egitera eraman gaituen kezka hori herritar gehienek partekatzen dutela uste dugu. Herritarrengandik gertuen dagoen erakundea izanik, ezinbestekoa iruditzen zaigu Debako Udalak herritar gehienon kezka hori bere egin, eta egunez egun Israelgo Estatua egiten ari den nazioarteko zuzenbidearen urratze larria salatu dezan.

AZALPENA

Heriotza eta suntsipena dira nagusi Gazan eta jada Palestinako txoko askotan ere bai. Gaurdaino Israelgo gobernuak, bere armadaren bidez, 30.000 pertsona inguru hil ditu. Milaka pertsona zauritu, lekualdatu, eta okupazioaren ondorioz, ur, janari, erregai eta medikuntzarako hornidura faltaren eta deshidratazio larriaren ondorioz hiltzen ari dira. Israelgo soldaduek herri, auzo, azpiegitura asko suntsitu eta hondakin bihurtu ditu.

Ez dago bizi-aterpe segururik ihesean dauden milaka pertsonentzat. Euren lurraldean palestinar jendea preso edo errefuxiatua da, euren herriak heriotza-kartzela bilakatu dituelako israeldar genozidioak. "Israelgo ekintza genozidak" ez dira ehun egun hauetara mugatzen, baina, prozesu honetan, 75 urteko apartheid-a, definitzen joan da suntsidura, heriotza eta herri oso baten ukazioa. Historikoki egiaztatutako gertakari horien aurrean, gogoratu behar da Israelek etengabe urratu dituela Nazio Batuen ebazpenak. Azken hilabeteetako izugarrikeriaren neurriak, ordea, Israelgo okupazio militarren estrategia politikoa erakutsi digu: palestinar herriaren suntsidura. Urriaren 7tik aurrera palestinar herriaren aurkako genozidioak, ordea, oso jarrera konprometituan utzi du Nazioarteko Komunitatea. Nazioarteko Komunitateak nahiago izan du modu irmoan ez inplikatu eta pasiboki onartu herri palestinarren aurka Israelgo Estatua gauzaten ari den okupazio militarra.

Horregatik guztiagatik, martxoaren 21ean egingo den osoko bilkuran, Debako Udaleko alderdi politikoei honako hau onartu dezatela eskatzen diegu:

1. Debako Udalak irmotasun osoz arbuiatzen ditu Israelgo Estatua Gazan zein Palestinako beste lurraldeetan egiten ari den ekintza militarrek, nazioarteko zuzenbidearen urraketa larria dakartenak.

2. Debako Udalak erasoak berehala gelditzeko eskatzen du, eta Israelgo armada Palestinatik erabat erretiratzeko, hango herriari erabateko elkartasuna eta estimua adieraziz. Era berean, atsekabe sakona agertzen du, biktimengatik eta herritarren alferrikako sufrimenduarengatik.

3. Debako Udalak Eusko Jaurlaritzari eta, honen bitartez, Europar Batasunari eskatzen dio, Palestinari beharrezko laguntza finantzarioa eta humanitarioa eskaintzeko.

4. Debako Udalak Europar Batasunari, Espainiako Estatuari eta Eusko Jaurlaritzari eskatzen die, ahalik eta azkarren antolatzeko eta eraso militar horretatik erator daitezkeen errefuxiatuak ahalik eta baldintzarik onenetan hartzeko. Halaber, konpromisoa hartzen du harrera duina bermatuko duten espazioak eskaintzeko haur eta heldu palestinarrei.

5. Debako Udalak irmo eskatzen dio Israelgo Estatuari nazioarteko legedia errespetatzeko, armak baztertzeko eta bide diplomatikoetara itzultzeko.

6. Debako Udalak Larrialdi Humanitariorako dirulaguntza bat onartuko du, Gernika-Palestina elkartearen bidez, Palestinara bideratuko dena.

7. Debako Udalak bat egiten du Israelekiko boikot, desinbertsio eta zigorrekin hau da, konpromisoa hartzen du Israelgo jatorria duten produktu baztertzeko eta Israelgo enpresekin kontrataziorik ez egiteko.

Deban, 2024ko martxoaren 11n

Deba-Palestina Herri Ekimena